

適園叢書

張宗祥



通國書局

上海



還

稿

山

二

饋

齋

余家渭川竹林自少遊筠溪南溪柳塘累視石上紫陽楊先生詩律清逸爽麗無邁羣輩稽其名爲奐字爲煥然世爲奉天人紫陽爲號余甚賞慕然祇目爲名騷墨後閱元史列傳暨其墓狀始知先生修家于金仕國于元造化關陝諸彥爲後學著龜乃近世眞儒也所著有還山集六十卷他集仍百餘卷余喜曰人不得而睹也得覩其書幸哉歷詢諸鄉先進則皆曰華夷一大變其書世或不有予憮然歎曰惜哉元以及今幾何日文獻泯如也今歲春余偶漂泊南陽太守宋西巖子先生鄉士館延余城南官舍談暇忽出書授余云還山遺稿余以爲全集也驚喜曰幸哉余終當屢嚼先生之腴而曰非也實我旁求三十年僅獲百一所謂泰山旣摧片石是

珍而掬勺水于竭海者也故云遺稿耳余乃長歎曰文獻果
 泯如耶惜哉於是披書涉獵至正統八例東遊記內二告文
 與姚仲茂論家廟遺制而復自喜尙得以窺夫先生光明浩
 博之學足纘古大儒之緒辭章自其枝葉後人追紹厥風卽
 是可尋也而復歎先生生長老死夷狄之代徒抱斯文未或
 大罄厥施也而又深喜夫宋子致志之勤星金點玉搜羅無
 失字缺所疑事注所在俾先生之學卒不墜地不減子弟於
 其父兄且將命梓以嘉惠天下厚之至也而又深歎夫余之
 玩愒日月視宋子尙友古人之篤瞠乎其未及也宋子斂容
 謝曰尙友惡乎敢亦惟仰師焉而未能耳余曰體哉謂尙友
 則近泰謂仰師焉則恭恭則虛虛則弘弘則永乎宋子名廷

佐字良弼嘉靖元年二月十五日終南山人王元凱堯卿書

還山遺稿卷上

後學宋廷佐輯

文

臂僮記

余鬚髮未甚白精神未甚頽以年齒計之六十有九衰亦宜矣所幸者目讀蠅頭細字如舉子時平生著述外無他嗜好其所以自得者亦足以自樂也兵火流離中僅存還山前集八十一卷後集二十卷近鑑三十卷韓子十卷槩言二十五篇硯簾八卷北見記三卷正統書六十卷蓋起於唐虞訖於五代也閒歲憂患叢至自三國以降規模已定而點竄有所不暇嘗億度之滿百二十卷乃可爲完書上下千數百載是

是非非能免疑誤經史插架濺濺如蠶二三僮子備朝夕檢閱奈何索甲而得乙語東而應西能盡如己意耶夫器利則事善固也獨無知者乎方皇皇閒會黃冠宋魯班志明爲子枴圓轉書廚以便觀覽其級也三象三才也其隙也六象六虛也頂末有樞紐常居其所而不移象極星也擬諸體用之妙則與天行健無異也是以正襟危坐聚所用書園而帙之終日左探右取循環而無端旣息呼叫之煩又絕奔走之宍或疾或徐或作或止不過一引臂而已因命之曰臂僮所謂用力少而見功多也今而後吾書其完乎彼徒知惡其圓曾知有無窮之方乎彼徒知惡其動曾知有無窮之靜乎且以器爲器止於斯矣抑知以人爲器乎惟其操乾旋坤幹之柄

圖垂拱仰成之逸不以手足耳目自役急於得人而器使之
雖四海至遠萬機至繁將何事之不濟何功之不遂孔子曰
無爲而治者此也敢再拜以獻甲寅清明日奉天老民記

此記得於內兄王平川平川得於邑人靖川馬氏敬錄
如右寓仰止焉廷佐識

汴故宮記

己亥春三月按部至於汴汴長史宴於廢宮之長生殿懼後
世無以攷乃纂其大槩云皇城南外門曰南薰南薰之北新
城門曰豐宜橋曰龍津橋北曰丹鳳而其門三丹鳳北曰州
橋橋少北曰文武樓遵御路而北橫街也東曰太廟西曰郊
社正北曰承天門而其門五雙闕前引東曰登聞檢院西曰

登聞鼓院檢院之東曰左掖門門之南曰待漏院鼓院之西
曰右掖門門之南曰都堂承天之北曰大慶門而日精門左
昇平門居其東月華門右昇平門居其西正殿曰大慶殿東
廡曰嘉福樓西廡曰嘉瑞樓大慶之後曰德儀殿德儀之東
曰左昇龍門西曰右昇龍門正門曰隆德曰蕭牆曰丹墀曰
隆德殿隆德之左曰東上閣門右曰西上閣門皆南嚮東西
二樓鐘鼓之所在鼓在東鐘在西隆德之次曰仁安門仁安
殿東則內侍局內侍之東曰近侍局近侍之東曰嚴祇門宮
中則曰撒合門少南曰東樓卽授除樓也西曰西樓仁安之
次曰純和殿正寢也純和西曰雪香亭雪香之北后妃位也
有樓樓西曰瓊香亭亭西曰涼位有樓樓北少西曰玉清殿

純和之次曰寧福殿寧福之後曰苑門由苑門而北曰仁智殿有二大石左曰敷錫神運萬歲峰右曰玉京獨秀太平巖殿曰山莊莊之西南曰翠微閣苑門東曰仙韶院院北曰湧翠峰峰之洞曰大滌湧翠東連長生殿殿東曰湧金殿湧金之東曰蓬萊殿長生西曰浮玉殿浮玉之西曰瀛州殿長生之南曰閱武殿閱武南曰內藏庫由嚴祇門東曰尙食局尙食東曰宣徽院宣徽北曰御藥院御藥北曰右藏庫右藏之東曰左藏宣徽東曰點檢司點檢北曰祕書監祕書北曰學士院學士之北曰諫院諫院之北曰武器署點檢之南曰儀鸞局儀鸞之南曰尙輦局宣徽之南曰拱衛司拱衛之南曰尙衣局尙衣之南曰繁禧門繁禧南曰安泰門安泰西與左

昇龍門直東則壽聖宮兩宮太后位本明俊殿試進士之所
宮北曰徽音殿徽音之北曰燕壽殿燕壽殿垣後少西曰震
肅衛司東曰中衛尉司儀鸞之東曰小東華門更漏在焉中
衛尉司東曰祇肅門祇肅門東少南曰將軍司徽音聖壽之
東曰太后苑苑之殿曰慶春慶春與燕壽並小東華與正東
華對東華門內正北尙廐局尙廐西北曰臨武殿左掖門正
北尙食局局南曰宮苑司宮苑司西北曰尙醢局湯藥局侍
儀司少西曰符寶局器物局西則撒合門嘉瑞樓樓西曰三
廟正殿曰德昌東曰文昭殿西曰光興殿并南嚮德昌之後
宣宗廟也宮西門曰西華與東華直其北門曰安貞二大石
外凡花石臺榭池亭之細并不錄觀其制度簡素比土階茅

茨則過矣視漢之所謂千門萬戶珠壁華麗之飾則無有也
然後之人囚其制度而損益之以求其稱斯可矣文類

射虎記

吾友隴東康楫來乞射虎記問其故爲郡尉曹侯設也吁人
之所欲詳誠吾之所欲略子徒知其去虎之虎焉知其去非
虎之虎且多乎哉夫虎之殺人也見於跡人猶得而避之其
害細所謂非虎之虎殺人也藏於心使人不知其所避必狎
而就之其害巨一擾之後無地無之奚獨郡也哉若夫嘯凶
嗥醜伏晝伸夜禁緩則跳踉勢窮則騰躑者盜虎也氣吞一
邑塊視四鄉逞貪婪之欲啗孤羸之利者豪虎也矇昏昧由
誣下罔上掉難折之舌吐無證之辭者訟虎也假威官府擇

肉墟落志在攫拏情忘畏惕者此吏虎也爪牙爲名意氣自若倚事以下鄉幸賊以中人者此兵虎也又若鉤距成性搏擊充己據案弄威攘權護失者同僚之虎也公銜上檄私爭己忿擁妖抱妍醉釀飽鮮者過客之虎也人謂郿有曹侯則盜者遁豪者懾訟者弭吏爲之縮手兵爲之斂跡同僚服廉而退讓過客憚正而引避綱而舉之其政亦足知矣宜乎邑之民途不掇遺寢不闔戶熙熙然坦坦然各保其性命子以射虎爲虎則漢豈無李廣唐豈無裴公勇於政斯可矣裴李世聞其射而未聞其政如曹侯可謂兩得之矣然吾不以去虎之虎爲賢而以去非虎之虎爲賢者鄙意實在茲侯名大中字時正隆安人家世官職孔臨洮嘗載之皆不書子袖此

以歸其告郿人旣去而思當淚吾文郿縣志

跋趙太常擬試賦藁後

金大定中君臣上下以淳德相尙學校自京師達於郡國專事經術教養故士大夫之學少華而多實明昌以後朝野無事侈靡成風喜歌詩故士大夫之學多華而少實上病其然也當泰和丙寅春三月二十五日萬寧宮試貢士總兩科無慮千二百輩上躬命賦題曰日合天統侍臣初甚難之而太常卿北京趙公適充御前讀卷官獨以謂不難卽口奏賦議乃定旣而中選者纔二十有八人僕時甫冠獲試廷下而席屋偶居前列朝隙聞異香出殿櫺閒一紫衣人顧予起問題之難易及氏名里貫年齒而去少頃復相慶曰適駕至矣憐

暮出宮傳以爲希遇嘗退而志之後四十五年僕以河南漕
長告老於燕過太常之孫承祖家得所擬貳感念存沒不能
不惘然爲敘其末并以舊詩歸之所謂月淡長楊曉色清天
題飛下寂無聲南山霧豹文章在北海雲鵬羽翼成玉檻玲
瓏紅露重金鑪縹緲翠煙輕誰言夜半曾前席白日君王問
賈生者是詩少作也無可取以其紀一時之事庶附趙氏家
傳或見於後世云文類

錦峰王先生墓表

先生姓王諱仲元字清卿家平陰廣道先生之猶子明道先
生之子世以儒道著一時名公鉅人若党懷英趙渢皆師尊
之先生舉進士有聲承安五年四舉推恩資高雅清苦寡言

笑無雜賓嘗知阿干縣憲司以簡靜聞退食擁琴書不出正襟危坐似與世相忘也遇會心者雖對談竟日未嘗涉貴游可喜事人信其爲古君子也而書名尤重小楷介歐虞閒用薦者召應奉翰林文字同進士入玉堂自先生始改陝西東路轉運司鹽鐵判官適書藍田山碑飲玉漿偶得疾死於官舍貞祐四年也死之日家無餘貲藁葬城南雁塔之陰鄰永平王尙書曠墓經兵寺宇廢蕩荆棘蕞沒迷所在後三十八年尙書子元卿至宿其在墓西十五步初元卿許並負而東旣而恐親族零落無可歸甲寅五月九日奉天楊奐感念平素會長安邠邦用楊天德來獻臣同德張琚高唐趙安世析津張徹燕南毛居仁耿都陳受雲中孟攀鱗太華郭時中鄆